

Protocol no. 14
Sezzüda da marcurdi, 11 avrigl 2012, 9.00 – 12.00

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)
Preschainta pro la tractanda 83 Maria Sedlacek, pres. Cusagl
da vaschins

Protocol

Il protocol no. 13 da la sezzüda da gövgia, 5 avrigl 2012 vain approvà.

84 942 POSSESS DA FINANZAS D'EDIFIZIS
Cumprita chamonna da Mariers

La presidenta dal Cussagl da vaschins preschainta la situaziun actuala a regard la chamonna da Mariers. Dal 1994 d'eira gnü dat permiss da fabrica cun procedura per stabilimaints dadour la zona da fabrica a la società da sgüranza da muvel per metter sù üna chamonna pel paster da trimmas sù Mariers. I's ha però interlaschè da far cul cumün da vaschins ün contrat da dret da fabrica co ch'id es üsità eir per tuot tshellas chamonnas sül territori da Sent. Intant es la società da sgüranza da muvel da Sent gnüda scholta e la chamonna da Mariers es rivada in possess da la società d'alp e chascharia da Sent. Causa cha las structurass per alpagnar muvel as han müdadas i'ls ultims ons fermamaing, nu vain la chamonna da Mariers daspö blers ons plü douvrada per pastriglia, uschè cha la società d'alp e chascharia vuless vender la chamonna. Tenor ils contracts üsitats ha il cumün da vaschins il prüm dret da cumprita, ma causa cha'l cumün da vaschins nun ha possess da munaida fa la presidenta la dumonda scha'l cumün politic surpigliess quista cumprita finanzialmaing. Il predschi es fixà sco pro tuot ils contracts tenor la stima, in quist cas cun fr. 26'300.--. Causa cha'l Cussagl cumünal vuless sclerir amo diversas dumondas vain la decisiun a regard il credit suspaisa fin cha las dumondas sun scleridas in detagl.

85 860 PROVEDIMAINTE ELECTRIC
Fundaziun da l'instituziun „Rait Engiadina“ (RE)

La giunta da la corporaziun dals cumüns concessiunaris da las OEE ha elavurà la documainta da basa per unir las raits electricas dals cumüns concessiunaris. La proposta da la giunta es cha'ls cumüns interessats fuondan cumünaivelmaing ün'instituziun da dret public autonoma (selbständige öffentlich-rechtliche Anstalt) cul nom „Rait Engiadina“ (RE) chi ha per mera da s-chaffir structurass professiunalas ed efficiantas per ün provedimaint d'electricità independent a favur dals cumüns interessats. Davo la fasa consultaziun pro'ls cumüns esa previs cha'ls votants dals singuls cumüns decidan schi vöglian entrar illa RE. Quista decisiun ha da gnir tratta fin la fin da gün 2012.

86 790

PLANISAZIUN DAL TERRITORI

Revisiun parziala Panas-ch Sura - Posiziun dal cumün da Sent

Davo cha'ls votants da Sent han acceptà als 25 settember 2011 la revisiun parziala dal plan da zonas a Panas-ch Sura es la documainta gnüda inviada a la regenza grischuna per l'approvaziun. L'approvaziun tras la regenza as basa in quist cas sülla proposta da l'uffizi per il svilup dal territori Grischun (ARE) chi prepara l'affar a man da la regenza. L'ARE ha examinà la revisiun parziala ed ha formulà sia proposta chi include in tscherts puncts eir la posiziun inoltrada a l'ARE da la Pro Natura e dal WWF. Tanter singulas pretaisas chi concernan la renaturalisaziun da l'implant d'explotaziun nu chatta impustüt la zona da mansteranza e l'ingrondimaint da tala l'acconsentimaint da l'ARE. Il cumün da Sent ha, insembel cun l'Uina SA sco firma concessiunara per l'implant d'explotaziun a Panas-ch Sura, l'ocasiun da tour fin la fin dal mais posiziun a regard la proposta da l'ARE. Adonte cha la zona da mansteranza nun es decisiva per la gestiun da l'Uina SA, decida il Cussagl cumünal da respectar la voluntà dals votants a la votumaziun dals 25 settember 2011 e da motivar illa posiziun dal cumün sper ils ulteriurs aspects eir la necessità da la zona da mansteranza e da l'ingrondimaint da tala a Panas-ch Sura.

87 140.506

Pumpiers

Fit pel local da pumpiers aint il lavuratori a Tuols

Daspö la fin dal 2010 po il cumün da Sent spordscher al corp da pumpiers Pisoc novas localitats i'l lavuratori a Tuols sainza cha'l fit pels locals füss gnü adattà. In vista cha eir tschels cumüns dal consorzi da pumpiers mettan in quint il fit per las localitats tenor ils cuosts impuonüts, paressa evidaint d'adattar eir il fit per las localitats novas a Sent. Il schef da pumpiers vain incumbenzà da sclerir pro tschels cumüns a man da che criteris chi vain calculà il fit pels locals sports al corp da pumpiers Pisoc.

88 790

PLANISAZIUN DAL TERRITORI

Plan directiv regiunal – Cunfin static

La fin da l'on 2011 vaiva il cumün da Sent inoltrà a la PEB üna correctura a regard il cunfin static vers ost dal cumün pel plan directiv regiunal chi cumpiglia eir ün scumond per fabricats agriculs novs dadaint quel cunfin. Uschè gniss pussibilità ün svilup futur dal cumün vers ost. Il schef da planisaziun preschainta la proposta pel cunfin static fatta a la PEB e propuona da far amo üna correctura in resguardond il traget d'üna futura chanelisaziun. Implü propuona il schef da planisaziun d'inoltrar pel plan directiv regiunal amo ün ulterior cunfin static e quai vers nord dal cumün, sü Flüs sur la foppa tanter las stallas da las famiglias Schweizer e Bösch. Il cunfin static definess e limitess uschè eir il spazzi per ün eventual svilup futur dal cumün vers nord. Il Cussagl cumünal decida, in assenza dal schef da planisaziun sco interessà in quist cas persunalmaing, d'inoltrar la correctura dal cunfin static vers ost sco preschantà. A regard il cunfin static vers nord decida il Cussagl cumünal d'inoltrar ün cunfin static, però per intant amo sainza scumond per eventuels fabricats agriculs novs.

89

ORIENTAZIUNS

Posta

Il capo orientescha cha Daniel Koller da la TESSVM haja dat cuntschiant il parair da la TESSVM a regard las differentas variantas da localitats pel büro da turissem insembel cun l'agenzia da Posta. Sco soulziun provisorica gnissan per la TESSVM in dumonda dafatta las localitats a Schigliana. Las circumstanças a regard ün'eventuala cumprita dal stabilimaint da la Posta e las variantas alternativas gnaran preschantadas a la radunanza d'orientaziun.

L'actuara: